

BAB KELIMA

PENUTUP

BAB KELIMA

PENUTUP

5.1 KESARJANAAN SYEIKH DAUD AL-FATANI

Syeikh Daud adalah seorang ulama prolifik pada zamannya. Hasil-hasil karyanya dalam pelbagai disiplin ilmu serta bentuk penulisan, membuktikan beliau memiliki ilmu yang sangat tinggi. Beliau bukan sahaja menghasilkan karya dalam Ilmu Fiqh, tetapi juga dalam bidang Usuluddin, Tasawwuf, Sejarah serta menghasilkan kitab-kitab fatwa. Kepelbagaian bakat ini jarang ditemui pada pengarang-pengarang Melayu yang lain kerana kebanyakan mereka mahir dalam bidang-bidang tertentu sahaja, umpamanya Hamzah Fansuri dalam bidang Tasawwuf, Abdul Rauf Singkel dan Muhammad Arsyad al-Banjari dalam bidang Fiqh.⁵⁷⁹ Beliau menulis bukanlah untuk mencari nama atau tujuan-tujuan lain, tetapi semata-mata mencari keredaan Allah s.w.t.

Selain mengarang beliau juga turut aktif mengajar semasa di Mekah.⁵⁸⁰ Di samping status beliau sebagai seorang guru, hasil-hasil karyanya merupakan satu bahan dakwah dalam usaha menyebarkan dakwah Islamiah khususnya ke rantau Nusantara. Ini adalah melalui perantaraan murid-muridnya yang datang dari seluruh pelosok Nusantara untuk memperdalam ilmu agama di Mekah dan Madinah. Antara murid-murid beliau yang terkenal ialah Syeikh Ismail Minangkabau, Syeikh Khatib Sambas, Raja Ali Haji Riau, Syeikh Abdul Halim Kelantan, Syeikh Muhammad Zain

⁵⁷⁹ Abu Hassan Sham (1991), "Pengaruh Karya-Karya Syeikh Daud Fatani Dalam Sastera Melayu" (*Nadwah Ilmiah Tokoh Ulama* Peringkat Kebangsaan Kali ke 4, 17 –19hb Disembar, 1991, di Dewan Muktamar, Pusat Islam Malaysia, Kuala Lumpur).

⁵⁸⁰ Wan Mohd. Shaghir (1990), *Syeikh Daud b. Abdullah al-Fatani : Ulama dan Pengarang Terulung Asia Tenggara*, *op.cit.*, hlm. 26.

Bin Mustafa al-Fatani Syeikh Zainuddin Acheh, Syeikh Abdul Malik Isa (Tuk Pulau Manis) Terengganu dan lain-lain.⁵⁸¹

Selain menulis dan mengajar, Syeikh Daud juga adalah pengamal beberapa buah tarekat yang diambilnya secara berijazah dari guru-gurunya. Tarekat-tarekat itu ialah *Syafāriyyah*, *Sammāniyyah* dan *Syādhiliyyah*. Dalam hal ini, sumbangan amali beliau yang paling besar selain tulisannya yang menerangkan *kayfiyyah* zikir tarekat *Syafāriyyah* ialah penyabaran tarekat ini di Nusantara yang sudah tentu melalui ketokohan dan keilmuan beliau dalam ilmu ini sehingga menjadi guru kepada sekian banyak murid sama ada dari Kepulauan Melayu hingga ke Champa dan Burma.⁵⁸²

Pendek kata, keilmuan yang dimilikinya itu layaklah beliau diberi gelaran *al-'Ālim al-'Allāmah al-'Ārif al-Rabbānī*.

5.2 KEPENTINGAN KITAB *MUNYAH AL-MUŞALLI*

Kitab *Munyah al-Muşalli*⁵⁸³ ini, menjadi bukti kepada keilmuan Syeikh Daud. Kupasan dan huraiyan yang mendalam pada bab sembahyang dan disusun dengan teratur memudahkan para pelajar mempelajarinya hatta orang awam sekali pun. Kitab ini juga merupakan kitab yang paling banyak disalin sebelum ia diterbitkan dan antara kitab yang paling banyak digunakan di dunia Melayu untuk pengajaran ilmu fiqh khususnya dalam bab sembahyang.⁵⁸³ Ini sekali lagi membuktikan bahawa pengaruh, ketokohan dan keilmuan beliau begitu besar sekali di rantau Nusantara ini.

Kitab ini adalah satu-satunya karya beliau yang menerangkan ibadah sembahyang dengan lengkap. Walau pun beliau ada menghasilkan kitab-kitab fiqh lain yang lebih

⁵⁸¹ *Ibid.* hlm 42.

⁵⁸² *Ibid.* hlm 136.

⁵⁸³ Wan Mohd Shaghir (1999), *Munyatul Muşalli*, *op.cit.* hlm. 3

besar dan mencakupi keseluruhan topik-topik dalam ilmu fiqh, seperti *Sullam al-Mubtadi*,⁵⁸⁴ *al-Jawāhir al-Saniyyah* dan *Hidāyah al-Muta'allim*, namun huraiannya dalam bab sembahyang tidak mendalam seperti mana huraiannya dalam *Munyah al-Muṣallī*.

Huraihan dan kupasannya itu menjadikan ia mudah dipelajari dan difahami, malah kitab ini dijadikan pengajian asas hampir setiap pondok di negeri Kedah khususnya pada satu ketika dahulu.⁵⁸⁴

Pada penelitian penulis, perbahasan kitab ini adalah berdasarkan mazhab *al-Syāfi'i*. Ini kerana Syeikh Daud mengambil pandangan-pandangan daripada fuqaha Syāfi'i, seperti Imam al-Ghazālī⁵⁸⁵ dan Imam al-Nawawi.⁵⁸⁶ Pandangan Imam al-Ghazālī diambil dari kitab beliau *Iḥyā' 'Ulūm al-Dīn* dan kitab *syarḥnya Iḥāf al-Sādah al-Muttaqīn* oleh al-Sayyid Muhammad al-Zubaydī. Manakala pandangan Imam al-Nawawi diambil dari kitab beliau *Syarḥ al-Muhadhdhab*.⁵⁸⁷

Syeikh Daud juga ada mengambil pandangan-pandangan daripada fuqaha Syāfi'i yang lain seperti Syeikh al-Bujayrimi,⁵⁸⁸ Syeikh al-Ramlī,⁵⁸⁹ dan Syeikh Ibn Hajar.⁵⁹⁰

Oleh kerana rantau Nusantara ini berpegang kepada mazhab Syāfi'i, maka tidak hairanlah kitab *Munyah al-Muṣallī* ini dan kitab-kitab fiqh Syeikh Daud yang lain mendapat tempat di kalangan masyarakat Melayu di rantau ini. Ini kerana segala amal ibadat, terutamanya ibadat sembahyang yang dilakukan oleh masyarakat Melayu adalah berdasarkan mazhab Syāfi'i.

⁵⁸⁴ Temu bual dengan Syeikh Ahmad B. Hj. Ali (Dato'), Ahli Jawatankuasa Fatwa Negeri Kedah di rumah beliau pada 4hb September 2002, jam 5.30 petang.

⁵⁸⁵ Contohnya seperti yang disebutkan pada muka surat 45 dan 59.

⁵⁸⁶ Contohnya seperti yang disebutkan pada muka surat 58.

⁵⁸⁷ Contohnya seperti yang disebutkan pada muka surat 64.

⁵⁸⁸ Disebut pada muka surat 57.

⁵⁸⁹ Disebut pada muka surat 109.

⁵⁹⁰ Disebut pada muka surat 109.

5.3 CADANGAN

Pada penelitian penulis, amalan ibadat sembahyang yang dilakukan oleh masyarakat awam masih belum menepati kehendak apa yang diketengahkan oleh Syeikh Daud dalam kitab *Munyah al-Muṣallī* ini. Bermula dari persediaan sebelum sembahyang, perkara-perkara yang menjadi wajib atau rukun dalam sembahyang, sunat-sunat *Ab'ād* dan *Hay'ah*, ciri-ciri kesempurnaan dalam sembahyang hingga kepada perkara-perkara selepas sembahyang seperti wirid-wirid dan doa-doa, masih banyak yang belum diamalkan oleh masyarakat awam.

Walaupun sembahyang mesti diasaskan kepada rukun-rukunnya, tetapi memelihara dan melakukannya dengan penuh ketelitian, *khusyū'* dan *tawāḍhu'* adalah perlu bagi mencapai serta memperolehi nilai ibadah yang tinggi lagi sempurna untuk dipersembahkan kepada Allah s.w.t.

Begitu juga dengan perkara-perkara sunat, perlu dipelihara dan tidak seharusnya ditinggalkan kerana kesempurnaan ibadah sembahyang banyak bergantung kepada perkara-perkara sunat.

Berdasarkan kepada faktor di atas, wajarlah risalah ini diberi 'nafas baru' dan diketengahkan semula dengan versi baru agar hasrat dan tujuan pengarangnya dapat diteruskan demi mencapai keredaan Allah s.w.t.

Sekalung *al-Fātiḥah* buat roh al-Marhum al-'Ālim al-'Allāmah al-'Ārif al-Rabbāni al-Syeikh Daud Bin Abdullah al-Fatani. Semoga rohnya dicucuri rahmat Allah s.w.t dan ditempatkan di kalangan para *Auliya'* dan *Syuhadā'*.

Āmin Yā Rab al-'Ālamīn.